

羅家倫
編
中華民國史料叢編

國民報
彙編

羅家倫
主編
中華民國史料叢編

國民報彙編

中國國民黨
中央委員會
黨史史料編纂委員會印行

PDG

中華民國七十二年四月再版

中國國民黨
中央委員會
黨史史料編纂委員會藏本

中華民國五十七年九月一日影印初版

國民報彙編

(精裝一冊)

定價：臺幣一五〇元
美金四元

發行者：中國國民黨黨史史料編纂委員會

臺灣省臺北市中山南路十一號之一
郵政劃撥帳戶一四六一八號

經銷處：中央文物供應社

臺灣省台北市中山南路十一號之一
郵政劃撥帳戶二一八一號

印刷者：國際印刷廠

臺灣省台北市大同街一二五號

究必印翻·有所權版

乎
知
PDG

國民報彙編發刊詞

毒蛇橫道烈焰轟天玄黃色變腥風撲人天慘地贖霧塞雲昏睽念黃族其形其狀莫可窮詰自私之禍終無出入衣鉢相傳膠漆若合骷髏死屍人類其絕哀哉悲哉遭此之遇當此之勢處此之運其將如斯民何哉大禍臨頭爲時匪遠豈將永永墮落泥犁地獄而勿自拔哉數年以來抱民族之主義慨壓制之苦痛熱心如浪血淚如湧挾其滿腔不平之氣鼓吹其聰明秀麗如笙如簧粲花翻爛之筆以與政府挑戰者頗不乏人是報始創於辛丑長獅一吼百獸震恐蓋吾國開幕民族主義之第一齣至此始交排場侶獨立之玄素播革命之種子光焰萬丈開作璀璨自由之花出現於冤海波濤如青鳳之廻翔如祥雲之布護我同胞之精神賴以昭蘇我同胞之靈魂爲之震盪我同胞其能乘潮急進光復我祖國從此人持一粒火不化異族全爲灰燼而不止乎今日者取彼良師資我國民爰

國民報 發刊詞

二

彙編一册付印成書想亦熱心愛國諸君子所樂贊成者也

黃帝降生四千三百九十五年歲次甲辰六月

東京國民報彙編目次

叙例

社說

原國 說國民 說漢種 亡國篇

時論

二十世紀之中國 中國滅亡論

外論

論清國財政 支那之產業 對清策

譯編

美國獨立檄文 歐洲近代哲學 革命新論 澳洲聯邦記 亞力斯度多政論

叢談

民權 自由不死 順民 議論一致之弊 天賦權與強權之說 俄國政體

歐洲最古之政學家 孟德斯鳩之論支那 家族政治 道德法律之別 東方
病人 自由之民 軍事與經濟 歷史上有名之尙武國

來稿

朱志東君來函 正仇滿論

雜錄

答問一則



叙例

劃一土於大地之中界。而命之曰國。群萬衆於一土之中域。而區之曰國民。則凡其國土之政治文化。生聚教訓。一切體國經野之事。即莫不待此國民之經理。而凡生殖族聚於其國土者。即與其國有密接之關係。即莫不當分任其責。而無一人得置身於事外。能盡其責而善其事。則其地治其國強。其民有完全無缺之人權。可表而異之曰國民。此歐美諸國國勢之所以強盛。人權所以發達也。中國之無國民也久矣。馴伏於二千年專制政體之下。習爲傭役。習爲奴隸。始而放棄其人權。繼而自忘其國土。終乃地割國危。而其民幾至無所附屬。甲午大創而後。驚於外人之國力。憬然知其致此之有由也。於是英俊之士。動色相告。其目注而心營者。莫不曰民權民權。嗚呼。西國之民權誠盛矣。要其所以獲此公權。享此幸福者。類皆盡重大之義務。負艱鉅之責任。糜心瘁力。而非安坐以致之者也。且西國百年以前。其國民之腐敗。人權之闇習。豈有異於中國之今日哉。二三碩學。如蒙德斯鳩盧騷諸人。起而大倡其說。於是萬衆承流。報章騰布。議論日聒於耳目。民智遂驟增其程度。故論人權發生之功。諸儒播其種。而報章實培其根。我中國之報章僅矣。頑固昏謬。顛倒黑白者。固所不論。

其能主持清議。莊言正論者。則類出於外人與黨人之手。夫以外人而言我國事。無論其情事之隔膜也。其立報之主義。固已別有他屬。則發言固多所忌諱。而立論亦借闡宗風。若黨人之報。豈不昌言無忌哉。然訾詆既多。傳播不廣。且表辨宗旨。日不暇給。而揚闡民義之事。固亦未遑多暇。此報章之設。垂三十年。而國民所以終未見發達也。同人痛之。不揣固陋。謀創是報。發其狂愚。月出二冊。都爲八門。名曰國民報。冀明我國民當任之責。振我同胞愛國之心。伊尹曰。使先知覺後知。使先覺覺後覺。拿破崙曰。報章者國民之教師。先覺教師。則吾豈敢。若以喚起國民之精神。講求國民之義務。自附於播種培根之末。或亦自盡國民之責歟。大雅君子。倘亦有樂於是歟。民智漸開。民氣漸奮。安見今日服從專制之人。不足抗衡於歐美。而享西國國民所享之人權也。

言論自由。文明之址。強聒不舍。頑懦興起。參綜衆長。潘筆樂旨。風雨如晦。嚶嚶不已。先有鷄鳴。後乃天曙。匪曰空言。聊附斯義。錄社說第一。

廿紀大地。風塵莽莽。况我極東。萬馬所向。指論事勢。風雲氣壯。睽懷大局。庶焉心賞。錄時論第二。

危詞憂時。微言譚道。衍奇朔諧。揮翰奮藻。九天九淵。游思所到。縱筆放言。窮其窳奧。匪曰碎金。庶爲雜俎。錄叢談第三。

盲古陸沈。曩哲所鄙。兵志有言。知彼知己。風雲百變。望背接趾。本末紀事。古史成例。敢援斯義。爲今世史。錄紀事第四。

賈山至言。長沙痛哭。時賢偉論。匡謬正俗。大雅不棄。助我張目。寧有遐心。爾音金玉。錄來文第五。

黃人禍害。歐人隱情。黃種膨脹。歐人所驚。保全分割。急激和平。此唱彼和。群議盈廷。聞者足戒。先睡後醒。勿謂謬言。啓蟄之寤。錄外論第六。

歐美政學。雲爛霞蒸。書報千億。偉論觥觥。日濡歐化。國勢勃興。彼耕我穫。撥秀擷英。恢我民智。輸進文明。錄譯編第七。

主客設難。究詰事理。此發一難。彼通一義。庶幾明辨。闡發宗旨。錄答問第八。





原國

亞西亞之東。有大地焉。爲白人所公有。凡其地重太之事。執其權者無一而非白人。故白人。之至其地者。縱橫跋扈。無所不至。蓋已奴隸其土人。牛馬其土人也久矣。然其土人冥然罔覺。自稱其地曰中國。其實瀕海之東。既不可謂中。偷生苟活。更無以爲國。國民曰。是所謂土地也。非國也。

土地之上。忽有霸王焉。用其兵力。竊土地以爲霸王。有又忽有盜賊焉。率其徒衆。竊土地以爲盜賊。有又忽有權奸焉。欺人孤兒寡婦。竊土地以爲權奸。有又忽有胡虜焉。恃其獷悍善戰。竊土地以爲胡虜。有此秦漢唐宋元明等號。所由來也。然所謂秦漢唐宋元明者。一家之謂也。其爭奪相殺。循環無已。皆一家之私事也。國民曰。是所謂朝代也。非國也。

土地之上。忽而有兵刑。忽而有錢穀。忽而有內政。忽而有外交。苟無人以經理之。則土地不治。故所謂君者出焉。所謂臣者出焉。皆爲民理事者也。然歷時既久。彼所謂君者。忘其所以舉土地爲一己之私產。舉人民爲一己之私奴。而悍然自稱曰國。故彼以爲然者。則曰若是者上不病國。下不病民。是病國與病民有上下之別矣。彼以爲不然者。則曰若是者國計民生。兩無裨益。是國計與民生有區域之分矣。嘻。彼之所謂國者。果吾之所謂國乎。國民曰。是所謂政府也。非國也。

然則所謂國者將何如。曰。自其外視之。則土地雖割。而國不亡。朝代雖易。而國不亡。政府雖覆。而國不亡。惟失其主權者。則國亡。故亞臘斯加可以賣。亞爾塞斯洛倫可以讓。於俄法無傷也。法有國而無朝。美有國而無朝。於法美無傷也。元之政府覆於明。元人之政府亡。正漢人之國所由興也。法之政府覆於普。普之專制政府亡。正法人民主之國所由興也。若夫所謂中國者。其主權何在。謂主權在民。則民無權。謂主權在君。則君無權。謂主權在諸侯。王大。臣。則諸侯王大。臣僻處于萬山之中。而不敢出。謂主權在疆。臣。則疆臣雍容坐鎮于各省之中。而待國之亡。則中國之主權。外人之主權也。大地之上。焉有主權亡而猶得謂之國者。自

其內視之。則人民也。君主也。官吏也。皆隸屬於國者也。譬之一公司。人民其股東也。君主其會計也。官吏其司事也。聚股東會計司事各人而謂之公司。聚人民君主官吏各部而謂之國。其義一也。故一國之中有國法。爲民者守之。爲君爲臣者守之。民犯國法。謂之亂民。君犯國法。謂之暴君。臣犯國法。謂之賊臣。其名不同。其罪同也。然則但舉一民不得爲國。但舉君若臣亦不得爲國。大地之上。焉有一人數人而自稱爲一國者。

然則所謂國者。果誰有之乎。曰。人人有之。即輿夫走卒。亦得而有之。人人不能有之。即帝王君主。亦不得而有之。人人有之者。謂人人對國有應盡之義務。既爲一國之人。即無所逃於一國之中也。人人不能有之者。謂人人於國有應得之權利。苟以一人而用其專制之權。是一國之所不容也。故任一國之陸沈。而理亂不知。黜陟不聞。以爲我終其身者。謂之忘國。抑人民之自由。抑人民之平等。而使之流離困苦。不得其所者。謂之賊國。忘國賊國。厥罪惟均。皆國之蠹也。

然則吾國之亡。果誰致之乎。曰。外人不能亡吾國。而國人亡之。君相不能亡吾國。而匹夫亡之。君相擅剝我土地。以裨外國。是盜賣我田產以自利也。君相擅吸我脂膏。以償兵費。是劫

掠我財物以媚人也。君相擅與他人立約。曰。某省不讓某人。某島不讓某人。是家僕與外賊通。以破主人之家室也。然吾民若罔聞知。不敢與之爭。若曰。吾儕小人焉知大計。是雖烹我。剝我。而我亦不敢動。所謂放棄其責任者也。於外人乎。何尤。於君相乎。何尤。

然則吾民之自外於國。果誰使之然乎。曰。是由不知無國之苦。試問廣州、九龍、膠州、旅、大、京津之民。廬舍被焚。財產被奪。妻女被掠。墳墓被掘。伏尸遍野。血肉狼籍。目不忍睹。耳不忍聞。此其故何也。曰。惟無國之故。試問美洲、澳洲、南洋、各島之地。逐我華民。焚我商店。飲我以毒藥。幽我以深坑。吞聲飲泣。莫可告訴。瓢泊異鄉。生還無日。此其故何也。曰。惟無國之故。嗚呼。印度人無國。而頻年荐饑者。飢欲死。波蘭人無國。而遷於西北利亞者。寒欲死。埃及人無國。貧欲死。猶太人無國。富欲死。無國之民。豈有他哉。終歸於一死而已。

故吾民苟立國則已。再不立國。則今日之慘。猶不爲甚。他日者。四萬萬之民。必將散之於西北利亞。散之於阿非利加。散之於澳大利亞。且所至之地。土人得而窘逐之。白人得而踐踏之。而所謂中國者。永無中國人之足跡。而所謂中國人者。地球上永無容身之地。是雖歷千萬年。億兆年。而終無立國之一日也。願問四萬萬同胞。將何以處此。

說國民

今試問一國之中。可以無君乎。曰。可。民主國之總統。不得謂之君。招之來則來。揮之去則去。是無所謂君也。又試問一國之中。可以無民乎。曰。不可。民也者。納其財以爲國。養輸其力以爲國防。一國無民。則一國爲邱墟。天下無民。則天下爲邱墟。故國者。民之國。天下之國。卽爲天下之民之國。誠如是。則上可以絕獨夫民賊之跡。下可以杜篡逆反叛之說。以一國之民而治一國之事。則事無不治。以一國之民而享一國之權。則權無越限。乃吾國之稱民者。賤之則曰小民。鄙之則曰窮民。嗚呼。久假不歸。妄自尊大。民安得不小。剝民之膏。以養一人民。安得不窮。吾則謂天下之至尊至貴。不可侵犯者。固未有如民者也。

雖然。大地之上。同是動物也。而有人類禽獸之分。同是人類也。而有白黃紅黑之分。卽同是一民也。而有國民奴隸之分。何謂國民。曰。天使吾爲民。而吾能盡其爲民者也。何謂奴隸。曰。天使吾爲民。而卒不成其爲民者也。故奴隸無權利。而國民有權利。奴隸無責任。而國民有責任。奴隸甘壓制。而國民喜自由。奴隸尙尊卑。而國民言平等。奴隸好依傍。而國民尙獨立。此奴隸與國民之別也。

何謂權利。曰。天之生人也。既與以身體自由之權利。卽與以參預國政之權利。故一國行政之權。吾得而過問之。一國立法之權。吾得而干涉之。一國司法之權。吾得而管理之。一國有利。爲吾切己之利。必合羣力以求之。一國有害。爲吾切己之害。必誓死力以去之。故權利者。暴君不能壓。酷吏不能侵。父母不能奪。朋友不能僭。夫然後乃謂之國民之真權利。若夫以一己之權利。拱手而授之他人。君主以一人而占有權利。我不敢與之爭。貴族以數人而私有權利。我不敢與之爭。甚且外人盜我權利。詐我權利。我亦不敢與之爭。是所謂放棄其權利者也。無權利者。非國民也。

何謂責任。曰。奴隸之所顧者。爲一人一家之事。國民之所顧者。爲同國同種之事。奴隸之遇事也。有畏蒞苟且之心。故在家則諉之父兄。在朝則諉之君相。是率一國之人而無任事者也。國民之遇事也。有勇往冒險之心。故一國之事。卽一人之事。一人之事。卽一國之事。是率一國之人而皆任事者也。然則理亂不知。黜陟不聞。視國家之利害休戚。如秦越之相肥瘠。孳孳焉。汲汲焉。求保其身家妻子。以偷生苟活于斯世者。皆放棄其責任者也。無責任者。非國民也。

何謂自由。曰。粗言之。則不受壓制。即謂之自由焉耳。壓制之道。不外二端。一曰君權之壓制。一曰外權之壓制。脫君權之壓制。而一旦自由者。法國是也。脫外權之壓制。而一旦自由者。美國是也。故凡受君權之壓制。而不能爲法國人之所爲者。非國民也。凡受外國之壓制。而不能爲美國人之所爲者。非國民也。且也。欲脫君權外權之壓制。則必先脫數千年來牢不可破之風俗、思想、教化、學術之壓制。蓋脫君權外權之壓制者。猶所謂自由之形體。若能跳出于數千年來風俗、思想、教化、學術之外。乃所謂自由之精神也。無自由之精神者。非國民也。

何謂平等。曰。天之生人也。原非有尊卑上下之分。自強凌弱。衆暴寡。而貴賤形焉。主奴判焉。故治人者爲主。則被治者爲奴。貴族爲主。則平民爲奴。自由民爲主。則不自由民爲奴。男子爲主。則女子爲奴。若是者。謂之奴隸之國。國民則不然。衝決治人者與被治者之網羅。則人人皆治人者。即人人皆被治者。衝決貴族與平民之網羅。則人人皆王侯。即人人皆皂隸。衝決自由民與不自由民之網羅。則律例之中。無奴僕之文字。海外華工。無苦力之稱號。衝決男子與女子之網羅。則男子有參政權。即女子亦有參政權。夫然後一國之內。無一人不得